





普庵至善弘仁圓通智慧寂感妙應慈濟真覺昭旣惠慶  
護國宣教大德菩薩語錄

頌證道歌并引

過去諸如來斯門已成就現在諸菩薩今各入圓明未來  
修學人當依如是法諸仁者斯門圓明究竟如是且作麼  
生會我道釋迦掩室於摩竭子長家成達磨面壁於少林  
老婆心切佛祖未生法不剩佛祖入滅法不欠永嘉識破  
叩曹溪表夢再三留一宿嗟盲叅者卜度邪因皆道一宿  
聞言熏天炙地如斯見解道遠邪深掣電之機何勞擬議  
如大王路新舊齊登作者忘機達人無證永嘉大師證道  
歌者釋十二分教為標指證百千妙門成現前我等忻逢  
重加頌贊大歲甲申隆興二年七月晦日普庵老人序



證道歌普韻連天風月和大千沙界一音聞妙契非聲能  
幾箇

君不見日面金仙如月面見非是見見無能霜天月暎瑠  
璃殿

絕學無為閑道人不曾禮拜不看經不動遍周塵刹海卓  
爾孤身混白雲

不除妄想不求真大開寶藏施珠玕窮子未諳門外立黃  
金窟裏作貧人

無明實性即佛性心淨還同佛土淨水鳥樹林聲色中殊  
無毫髮來爭競

幻化空身即法身且無分別與緣情青青翠竹無非相鬱  
鬱黃花搭地靈

法身覺了無一物入滅降生非出沒觀身實相亦如然究  
竟何曾離兜率

本元自性天真佛一體無邊含萬物迷時只道有西天悟  
未當甚乾蘿蔔

五陰浮雲空去來自是凡夫眼不開爛煮堅冰充午膳熟  
煎雪塊作油餛

三毒水泡虛出沒將無作有埋深窟洛浦曾將喻色身誰  
人解悟依靈物

證實相無人法不用尺刀并寸甲魔軍盡總證菩提大地  
須彌一芥納

刹那滅却阿鼻業閻羅共我休分別洋銅鏡汁即醍醐火  
輪便是禪心月



若將妄語誑衆生永劫不來世上行無縫塔中非相貌  
劈頭坐却老盧能

自招拔舌塵沙劫法界彌綸唯我舌未曾停歇說真經  
惟願含靈皆廓徹

頓覺了如來禪豈獨東方與竺乾充塞虛空無空缺  
一毛孔裏現三千

六度萬行體中圓從斯更不少油鹽一條山杖挑心月  
逢人只好哭蒼天

夢裏明明有六趣驢胎馬腹甚滋味負鞍嚼鏡償他錢  
何似今生早歇去

覺後空空無大千今年不離舊時天春夏秋冬花木節  
皆標實相耀心源

無罪福無損益不消更念波羅蜜念來年久却成魔返  
謗修行無聖力

寂滅性中莫問覓恰似他鄉迷路客東西南北總無知  
祇箇無知大奇特

比來塵鏡未曾磨多口雪峰大老婆漏泄天機光覲面  
癡猿猶自灑清波

今日分明須剖析天臨日照融光碧擔板玄沙不許名  
從古至今無影跡

誰無念誰無生過現未來心不停一念不生無我所即是  
彌陀親老兄

若實無生無不生將無生更覓無生太似揚聲欲止響  
太陽談裏點孤燈



喚取機關木人問觸目菩提誰辨論亡僧可喻木人機玄  
沙直指何勞頓

求佛施功早晚成一念無心道自明枯木寒灰渠自在無  
功用智等空平

放四大莫把捉本無毫髮堪依托地水火風亦假名十二  
緣生如兔角

寂滅性中隨飲啄渴飲飢餐無住着不患寡而患不均衆  
生和悅因斯藥

諸行無常一切空一切空處合元宗如如莫作身邊見法  
界無他一性同

即是如來大圓覺切忌將心重卜度鳥窠拈起布毛吹未  
透玄津休摸捺

決定說表真僧處處和光勿自能有時鼻孔撩天笑箇个  
衆生目患盲

有人不肯任情徵大地山河發問情一指頭端無兩樣普  
天市地一時明

直截根源佛所印三界虛生失性命印泥印水印虛空盲  
叅佩印成心病

摘葉尋枝我不能和根拔出示衆生只這菩提本無樹撩  
天暎岳碧層層

摩尼珠人不識師祖隨聲心未息南泉虛設一輪光千古  
萬古空相憶

如來藏裏親收得隨時影現青黃白珠體元無一色同無  
端也被瀉山索



六般神用空不空眼耳鼻舌身意同無皮鼓子教誰打古  
今今付與雷公

一顆圓光色非色記劍何勞舟上刻色即是空空不空取  
相凡夫當面隔

淨五眼得五力五通曾告瞿曇覓聞知見覺不相干因邪  
打正連天碧

唯證乃知難可測莫逐文章名利客聰明不敵死生關五  
蘊皆空何苦厄

鏡裏看形見不難徒勞渡水與登山演若達多頭不失狂  
怖自歇快平生

水中捉月爭拈得渠應不苟諸顏色吳道僧繇畫不成癡  
猿徹夜空擎擲

常獨行常獨步步步步不離佛國土不曾見有一衆生皆入  
無餘涅槃戶

達者同遊涅槃路箇箇無衫并沒袴一燈相續百千燈傳  
燈錄上名無數

調古神清風自高忘榮傲世性堅牢示一往還無箇事見  
人搖手莫怱怱

顏頰骨剛人不顧唯駕一乘稱廣度誰人肯上此蓮舟獨  
暢清風明月賦

窮釋子口稱貧雪曲高歌和沒人往來問道無言說月在  
青天水在餅

實是身貧道不貧七斤衫裏不容針搖頭只許無心得入  
水元來不動冰



貧即身常披縷褐教化衆生求解脫衆生愈把綵紅纏見  
我如斯嗔吐吐  
道即心藏無價珠十方諸佛我同身一切諸法皆無相萬  
法無非是我心  
無價珠用無盡刹刹塵塵光迥迥超騰今古絕形名四七  
二三宗慧命  
利物應機終不怯毗耶假說衆生病衆生了病即通光領  
取舊時元本柄  
三身四智體中圓猶說三千及大千八萬法門從此出吐  
哉王子去求仙  
八解六通心地印晃晃恢恢非遠近六通八解者全彰念  
彼勞生提後進

上士一決一切了十二時中常皎皎擲劍揮空大丈夫迴  
頭自覺無邊表  
中下多聞多不信文章學解增心病閻公未肯便饒伊確  
搗磨磨終不靜  
但自懷中解垢衣威音王佛汝須知已前妙得猶為二何  
況今時說是非  
誰能向外誇精進五千退席聞無信我寧速入於涅槃莫  
教隕落聲聞性  
從他誇任他非體若虛空物物齊無異孩童爭瓦礫更加  
黃葉止伊啼  
把火燒天徒自疲堅持十力助他非煩惱息時全體是速  
令直下發菩提



我聞恰似飲甘露非自非他誰作做累生未了此真身致  
使同他入夢戶  
銷融頓入不思議子細推詳我不是無相光中古佛傳盡  
被真空穿却鼻  
觀惡言是功德妙明豈假旃檀刻一言一喝徹圓音不用  
耳聞須得得  
此即成吾善知識道有說無真利益眉下縱橫放白光不  
動分身千百億  
不因訛謗起冤親斬却猫兒不作聲尤賴趙州收得橛草  
鞋搭腦笑忻忻  
何表無生慈忍力洞庭撞倒虛空喫不留絲髮與人知摩  
訶般若波羅蜜

宗亦通說亦通兩處由來劍刃鋒八還要義漫天訣七處  
徵心理一同  
定慧圓明不滯空黃幡直下起清風當時不得印宗老盧  
能有過且無功  
非但我今獨達了萬古宗心應不少皆從非相入無餘未  
離形名終莫曉  
河沙諸佛體皆同如今端坐大雄峯森羅萬象無藏隱元  
來只在一塵中  
師子吼無畏說巍巍不動威光攝十方方法界現全身且無  
伴侶相交涉  
百獸聞之皆腦裂穿山透石魔群折夜來依舊卓長空飽  
飲清風漱明月



香象奔波失却威木女來呼叫阿誰普賢露地空彈指一  
場敗闕少人知  
天龍窈聽生欣悅來散仙花岩畔列解空沒量道無能動  
地雨華重漏泄  
游江海涉山川披雲帶雨足連天道得來又下死三千  
里外為君傳  
尋師訪道為參禪先將鼻孔與人穿大喝一聲三日因塵  
毛猶掛曲床邊  
自從認得曹溪路鳥道澄空步坦途攬霧拏雲風亦怕降  
魔事畢念蘇盧  
了知生死不相關却把虛空作鼓鞞打者甚多聞者少禾  
山老漢實無端

行亦禪坐亦禪面壁淹淹過九年失錢遭罪神光駭今皮  
今髓過西天  
語默動靜體安然謝三拋下釣魚船剛道參方不出嶺癡  
人猶尚走如烟  
縱遇鋒刀常坦坦只因得隻金剛眼一相光中無二形劫  
火洞然無退返  
假饒毒藥也閑閑一吸西江尚不難達磨曾經無損缺後  
遺隻履葬熊山  
我師得見然燈佛歷劫有為從此沒心心相印了無生為  
君幾下蒼龍窟  
多劫曾為忍辱仙未曾頓悟此心源遭人活剝如斯苦學  
者當同救腦然



幾迴生幾迴死汨沒海中如泡子猛風擊浪了無休風靜  
源平非我所  
生死悠悠無定止改頭換面嗔復喜何如識取本來人只  
這喜嗔全是你  
自從頓悟了無生動寂無非共佛行人問正因無可表揚  
眉之外更無能  
於諸榮辱何憂喜金輪寶位瞿曇棄舍草履金永不窮大  
地生靈扶不起  
入深山住蘭若離色離聲無晝夜撞鍾擊鼓不知鳴地轉  
天回全不怕  
岑峯幽邃長松下月朗風高寒溜瀉潺潺古韻寶希奇賣  
向人前誰著價

優游靜坐野僧家嬾出塵中露爪牙莫恠道人無可有清  
風橫點白雲茶  
閒寂安居實瀟灑拄杖撐天猶嬾把興雲布雨濟含生試  
問乾坤誰渴者  
覺即了不施功遠旋三市叩盧公雖留一宿非他得自己  
靈光本廓通  
一切有為法不同百鍊精金勝赤銅自持自用應無盡濟  
老憐貪透日紅  
住相布施生天福不用鑽龜并買卜分毫不賺自家修如  
影隨形皆具足  
猶如仰箭射虛空力盡無功到底空如何得似三平老聊  
聞看箭劈開胸



勢力盡箭還墜依前六道無回避升沉不離法身中自是  
頑癡無智慧

招得來生不如意得少為多兒子戲廣大門庭不肯游街  
錢拖犁泥裏睡

爭似無為實相門朝歌暮拍整乾坤東邊打著西邊響到  
頭只用一光吞

一超直入如來地自是衆生不了利行住坐卧總皆真逐  
末興心成執滯

但得本莫愁末遠遠尋師多賺脫君子務本道須生不用  
牽麻并拽葛

如淨瑠璃含寶月昔時未悟今皆徹只有此心更沒心不  
覽邪師文字訣

我今解此如意珠貪見衣裏爍光輝行行到處不曾失再  
逢親友始無疑

自利利它終不竭一花五葉權分別森羅萬象影居中自  
古至今無漏泄

江月照松風吹不是渠儂更是誰參禪學道波波走豈知  
自有顆明珠

永夜清宵何所為遼天寶月共相輝泥牛入海無消息一  
聲木馬大陽隨

佛性戒珠心地印媯坊酒肆光迥迥寶壽見它打一拳從  
斯脫却勞生病

霧露雲霞體上衣何必緣塵百衲披大庾嶺頭拈不起盧  
公冷笑秀公癡



降龍鉢解帛錫也是如來隨事立顯權就實化衆生究竟  
皆從定慧出

兩鈷金鑲鳴歷歷大似簷頭雨滴滴試問衆方什麼聲迷  
心未達菩提力

不是標形虛事持釋迦老子要人知拈來放去非它物運  
水搬柴事事宜

如來寶杖親蹤跡莫比世間閑戲劇有時喚作沒絃琴忽  
然又道無孔笛

不求真不斷妄自古迄今無兩樣真妄猶如六月霜杲日  
炎天唯妙相

了知二法空無相泥塑金裝為佛像日日香花夜夜燈誰  
知在一毛頭上

無相無空無不空拈槌豎拂警盲聵解道狗子無佛性焉  
知全體與空同

即是如來真實相鬧市卓牌標榜樣子湖狗子咬三關未  
透玄機招業障

心鏡明鑑無碍十方刹土無邊背打破鏡來相見伊祇這  
圓光會不會

廓然瑩徹周沙界言語難詮無可解別傳一句了非言妙  
契圓通觀自在

萬象森羅影現中無頭無尾耀玲瓏常光運運從何起始  
覺渾身赤撻窮

一顆圓光非內外鎮海明珠今尚在仰山不敢自理藏問  
著靈知常不昧



豁達空撥因果不著片衣愛向火見他富貴便嗔嫌業海  
深何處躡

莽莽蕩蕩招殃禍佛寶金輪翻鏡磨十波羅蜜變洋銅飽  
喫多餐應不餓

棄有著空病亦然却將陰入定安禪阿賴耶識崑崙崙萬  
劫頑癡被業纏

猶如被溺而投火兩處未明令法墮速須親近正知人如  
常處此菩提座

舍妄心取真理猛火聚中求冷水勝熱婆羅請上山須更  
便入三摩底

取舍之心成巧偽夜枕髑髏渾說寐與他南面樂非輕不  
知自己無心地

學人不了用修行只應步步踏陰坑大光普照盲無識非  
時不共野狐爭

深成認賊將為子可惜祖宗田共土如今敗缺卒難收浪  
死虛生長劫苦

損法財滅功德寧作常貧岐路客身雖能觸不能知只為  
前因無準則

莫不由斯心意識三尸六賊空相逼一似龜毛縛猛風凡  
夫不體無消息

是以禪門了却心心心外別無心如今只是舊時底不  
換源機放曠吟

頓入無生知見力不問晴乾并雨濕逢場作戲弄心花彼  
自紛紛非我急



大丈夫秉慧劍一掃邪魔如掣電金剛三昧獨威雄不是  
觀音誰得見

般若鋒兮金剛燄無說無聞非頓漸倚天長放白毫光祈  
雨祈晴無不驗

非但空摧外道心人天皈仰至如今求男乞女頭頭應動  
樂歌歡用我聲

早曾落却天魔膽添不添兮減不減凍死不著賤人棍餓  
死不喫鬚邊糝

震法雷擊法鼓針鋒別發千鈞弩大地山河失却威獨坐  
雄峰孤眼普

布慈雲兮洒甘露潤物沛生無伴侶廬陵米價没人酬窈  
窕冥冥自相許

龍象蹴踏潤無邊騰雲駕霧謁諸天帝釋驚惶無處避尋  
光燭理扣金仙

三乘五性皆醒悟方知自有珍珠庫臨時分付與兒孫不  
勞更倚它門戶

雪山肥膩更無雜純一摩尼相間夾珠寶網影重重頂  
禮皈依無縫塔

純出醍醐我常納露地牛兒標白法潦倒瀉山獨自騎暫  
借鶯歌胡蝶拍

一性圓通一切性勸君莫犯西天令至道無難嫌簡擇杜  
口毗耶元不證

一法遍含一切法風飄飄兮雨颯颯一聲漁笛晃春光浪  
打孤舟聲自拍



一月普現一切水四處分舟同一體多中一了一中多莫  
學癡猿撈沼底  
一切水月一月攝翳眼盲夫胡指決都盧只這一心光年  
年來叫桃花月  
諸佛法身入我性狀似千燈合一鏡重重無盡意重重絕  
待靈明無可證  
我性同共如來合莫恠山僧情義薄與君相見不相知自  
脫方能解彼縛  
一地具是一切地凡夫不了爭名利名利何曾得到頭空  
歸夜壑勞關閉  
非色非心非行業休指黃花并綠葉說時似有證時無從  
此家邦大安貼

彈指圓成八萬門有無無有豈堪論假設千經并萬論直  
應迦葉不聞聞  
刹那滅却三祇劫更無絲髮相交涉無名天地亦非先有  
名萬物光重疊  
一切數句非數句任你玄言并妙註靈明烜赫塞虛空不  
住色聲光布施  
與吾靈覺何交涉雲門有客三機接語論千春不昧真深  
明此性無時劫  
不可毀不可讚邁古迄今光燦爛鎮州蘿蔔大三斤桶裏  
水兮鉢裏飯  
體若虛空勿涯岸通身是口說得半三種病人也會醫燈  
籠露柱常相伴



不離當處常湛然神光也不往西天德山話墮龍潭笑忍  
氣吞聲更不言

覓即知君不可見穿過髑髏無不遍舉頭鷄子過新羅失  
却桃花秋月面

取不得舍不得自是眼盲心裏黑居大洋海口焦乾兩手  
問人覓水喫

不可得中祗麼得更無魔黨相欺嚇狂怖自歇即菩提真  
淨妙明無間隔

默時說說時默佛祖妙機無法則除非親到此門中捧頭  
取正叅方客

大施門開無擁塞何須遠劫方修得只要無心直下休一  
顆圓光非異色

有人問我解何宗只堪搖手報伊靜靈利衲僧須瞥地何  
勞更說五家宗

報道摩訶般若力是境是心全不識凌雲謾道見桃花月  
面依然言不及

或是或非人不識是非不到休疑憶他真不若自家真推  
倒繩床何損益

逆行順行天莫測鄧隱峰破禪規則叢林動念幾千般倒  
立歸真誰勝得

吾早曾經多劫修大通智勝本同周因何佛法不現前為  
伊不薦混迷流

不是等閑相誑惑一失人身難再得善根微細惡因多地  
獄阿鼻無間隔



建法幢立宗旨語默風雲處處是莫言止道有曹溪失汝  
元常何益利

明明佛勅曹溪是曹溪一滴周天備法海澄清潤古今飛  
空著地誰知貴

第一迦葉首傳燈百萬人天聳耳聽金色頭陀聞不會拈  
花起處笑尖新

二十八代西天記祖祖相傳無別智唐朝八定四空禪有  
為不達真空位

入此土萬水千山同一路來時無物去時空稽首牟尼悉  
加護

菩提達磨為初祖梁王未契如聳瞽廓然無聖尚求名拂  
袖魏邦無處所

六代傳衣天下聞叅禪學道亂紛紛爭似丹霞燒木佛傍  
觀赤爛墮幽昏

後人得道何窮數萬別千差同此路成人者少敗人多達  
理契經無作做

真不立妄本空勸君賊過莫施弓越古超今無可有纖毫  
窒礙不能通

有無俱遣不空空空本無空針不容阿彌陀佛真金色相  
好無邊我等同

二十空門元不著三乘五教都拈却指頭消息甚分明病  
瘡何須重點藥

一性如來體自同聲聞執相有西東忽然撞出來時路九  
萬鵬程頃刻通



心是根法是塵根塵覩對轉迷情以火救火方為妙燒却  
從前業識心

兩種猶如鏡上痕直須達取嶺南能便顯秀公無跳脫徒  
勞四句語言爭

痕垢盡除光始現照見不似娘生面無頭無尾一般般千  
眼大悲也不見

心法雙忘性即真夜來夢見一天星南曹北斗無藏隱箇  
箇含光映法身

嗟末法惡時世心若利刀稱善慧却來林下鬧喧天反謗  
祖師全不是

衆生薄福難調制度日爭名并覓利千萬之中沒一人且  
道乘誰光出世

去聖遠兮邪見深祖師肚裏覓知音兩箇禪僧相借問舊  
時佛法不如今

魔強法弱多怨害跣足頭陀然頂蓋舍身求雨赤天晴凡  
情見此生輕退

聞說如來頓教門便將毒藥與它吞老胡被折當門齒任  
彼魔多體自存

恨不滅除令瓦碎百計千方來逞恠熙怡端坐古峰頭設  
若皈依還自拜

作在心殃在身汝身非與我同真臭爛腥臊無用處識神  
沉劫墮迷津

不須怨訴更尤人動是洋銅鍊汁淋更入火輪并剉碓牛  
頭獄卒鬻肝心



欲得不招無間業對境無心心自歇何須苦苦外馳求靈  
光獨耀如明月

莫謗如來正法輪我師累劫究方成然燈王佛親傳受後  
代兒孫萬莫輕

旃檀林無雜樹庭前栢子非相戲小中用大一時平大中  
用小無邊際

鬱密森沉師子住野干狐狗難逃駐橫吞碧漢體堂堂無  
位真人何處去

境靜林間獨自遊端威無動體皆周元來不管它人事任  
彼橋流水不流

走獸飛禽皆遠去知道本來無住處空無鳥跡地無蹤碧  
眼胡僧面壁觀

師子兒衆隨後何異趁麀羣諸獵狗掛角羚羊何處尋莫教  
回首連天吼

三歲便能大哮吼文殊也道難征闔遑遑權託罰賓牽如  
今脫體無人守

若是野干逐法王未曾舉步早郎當貴價精神賤價用渠  
露全身汝急忙

百年妖怪虛開口五伯生親狐兔走百丈峰前一句新不  
昧光中猶未了

圓頓教勿人情集雲峰下四藤根天下大禪誰識得荒茅  
野地少人耕

有疑不決直須爭強把磚磨馬祖前牛行不在車心打當  
時鼻孔廓遼天



不是山僧逞人我此事元來無兩箇教誨十八不共法共  
不共時是什麼  
修行恐落斷常坑說有說無只管爭教體未全言句落意  
識心隨聲色行  
非不非是不是是非不入三摩地一念普觀無量劫無去  
無來亦無住  
差之毫釐失千里掣電之機休擬議不在低頭與別思普  
光即是無師智  
是則龍女頓成佛一顆明珠非外物南方無垢自心光親  
見靈山分皂白  
非則善星生陷墜廣說不明宗正理名聞利養接群機業  
滿生沉無間底

吾早年來積學問衝風冒雨多迷悶一到曹溪更不疑方  
知往昔虛勞頓  
亦曾討疏尋經論永夜清宵習見聞只道多聞便是真誰  
知萬法皆方寸  
今別名相不知休陽燄空花豈可求龍舟舊閣閑田地一  
度羸來方始休  
入海蒹沙徒自困無本隨商過海門眼覩千珍并萬寶歸  
來不得一文分  
却被如來苦訶責尔我真心何間隔貪忙只欲外邊尋直  
至如今連眼塞  
數它珍寶有何益倚門傍戶癡心急被伊輕賤且無言衣  
裏明珠猶未識



從來蹭蹬覺虛行不辭山遠與深坑一檐須彌難放下愛  
觀峰頂秀峻嶒

多年枉作風塵客不問東西與南北只應好住便安身聞  
舉法身心似墨

種性邪錯知解不體玄機持五戒行行坐坐執空觀見境  
見塵增鬼恠

不達如來圓頓制丈六金身即我是離知名相更無知日  
夜燒香空自禮

二乘精進勿道心南宗北祖亂紛紛雖是善因招惡果幾  
時解得見天真

外道聰明無智慧養生只欲貪名利燒丹鍊藥學神仙有  
為不了終歸墜

亦愚癡亦小騃五百三百成團塊太公發願乳香燒蛇行  
鼠步終須壞

空拳指上生實解巡行數墨看經快圓蟾光體指俱迷枉  
入三途虛受辜

執指為月枉施功一處明時兩處通月形兼指無交涉十  
方刹海性含融

根境法中虛捏恠見說是師便禮拜汝從甚處到其間且  
作街坊兼化菜

不見一法即如來萬機頓絕笑咍咍將軍戰馬今何在野  
草閑花滿地開

方得名為觀自在豁達靈光非內外野橋村店混塵流乞  
我一文充布袋



了即業障本來空  
兔角主文擊  
狂風龜毛索子穿雲鼻  
理會乾坤空不空  
未了還須償宿債  
這箇冤家何日解  
得休休去且休休  
莫入它家饒了賣  
飢逢王膳不能餐  
百品千般耀目間  
將謂君家親用底  
誰知益我自生難  
病遇醫王爭得瘥  
盧醫體貌殊巖恠  
我見堂堂心膽驚  
不領仙丹從此壞  
在欲行禪知見力  
活計千般全不識  
十波羅蜜鎮長存  
龐公老漢通消息  
火裏生蓮終不壞  
念念勞生不自在  
彼既丈夫我亦然  
舍短從長無罣礙

勇施犯重悟無生  
挑起三衣即便行  
逢人指出無心物  
當下迴光似不曾  
早時成佛于今在  
餅傾不出周沙界  
妙音遐暢廣宣揚  
念者念兮拜者拜  
師子吼無畏說直言  
恰似翻成拙問渠  
何處住居家遙指  
前坡無處訣  
深嗟朦朧頑皮韃  
只道無人來剔撥  
我今年少或龍鍾  
胡亂度生管麼撻  
祇知犯重障菩提  
彼者堪修我不宜  
龍女化身來警世  
畜生驢馬我同伊  
不見如來開祕訣  
過現未來冤重疊  
罪性如空法亦然  
罪法俱忘心瑩徹



有二比丘犯媼殺自嗟自怨無覺察遠棲林野望成真自  
業茫茫誰擺脫

波羅螢光增罪結却把小乘文句說疑心到此轉懷惶莫  
恠經非人自拙

維摩大士頓除疑離四句兮絕百非實相門中非我所一  
輪心月鎮光輝

猶如赫日消霜雪逡巡業海皆枯竭露出毘盧體不分別  
無藝解堪施設

不思議解脫力不是思量心外得一句當天八萬門野橋

金柳依依色

妙用恒沙也無極豈恡叅方來問詰何勞舉指與言詮杖  
頭一眼明如日

四事供養敢辭勞自有摩尼價最高任君寶滿三千界性  
無利益謾豐豪

萬兩黃金也消得道人有甚相交涉家中祖代沒分文廣  
度河沙三界客

粉骨碎身未足酬念渠多劫力勤修如今分付無人要放  
體閑眠百草頭

一句了然超百億如如不動纖毫力普眼當觀如是奇春  
晴曉霧連天碧

法中王最高勝一微塵裏光無盡無邊身相入微塵轉大  
法輪常普應

河沙如來同共證光光相徹無餘剩各申右手摩其頂龍  
天萬億咸皈命



我今解此如意珠不論貧富灌頭舒出沒往來無欠缺四  
生六道入無餘

信受之者皆相應不落有無凡與聖八面清風宇宙寬日  
月從他渾自性

了了見無一物唯有天真一如佛普賢腹裏接觀音善財  
稽首稱奇特

亦無人亦無佛廣大樓臺彌勒宅豁開門戶接群生一念  
無心全用得

大千沙界海中漚何必春風更點頭雪夜一枝渾漏泄速  
傳驛馬進王侯

一切聖賢如電拂智尊不動琉璃色紫金光聚沒遮欄說  
甚寒山并拾得

假使鑊輪頂上旋萬里神光體自然邪魔似雪飛湯裏安  
能驚動老婆禪

定慧圓明終不失天迴地轉光澄寂劫火洞然轉轉新箇  
事如如誰委悉

日可冷月可熱凡夫倒用成磨滅大道圓明一性通春夏  
秋冬誰辨別

衆魔不能壞真說真說無言光廓徹包含萬有不曾生大  
地亡鋒并結舌

象駕崢嶸謾進途氣冲牛斗耀昏衢日月失光誰敢顧萬  
邪冰爍絕名模

誰見螳螂能拒轍螢虫七夕吞明月織女心寬不作聲牽  
牛一棒和空折



大象不遊於兔徑針鋒頭上禮觀音百尺竿頭猶進步十  
方法界現全身

大悟不拘於小節猛燄爐中撈霰雪石頭垂足示長髭修  
行有甚相交涉

莫將管見謗蒼蒼井底蛙牛逞巨江乾坤大地一隻眼用  
未還似一毫芒

未了吾今為君訣一字不留無可說耀古騰今徹底輝不  
離當體常光潔

普庵歌

祇箇普庵純寶貝妙慧莊嚴真暢快無門為戶到人稀萬  
里神光圓頂蓋非相身無不在體露堂堂聲色外世間夢  
幻曷能隨超出世間那肯愛絕意識無眼界淨名卧疾瞿

曇解指權就實度衆生勿謂古賢來捏恠悟普庵本無壞  
空劫有窮渠自在四生六道豈相干物我兼忘心唯最無  
有無內非內海印發光誰敢對森羅萬象普庵收絕待靈  
明全體會忘能所勿知解在礫真金誰肯買若還不是老  
胡來覲面難逢輪劫背雪齊腰求教誨得旨忘言轉不退  
百鍊金剛無孔錘要斷龜毛兔角罪如意珠我今解刹刹  
塵塵銷障昧一毫端量大千輝燦破無明生死袋

顯元歌

不識本家元寶貝汨沒緣塵生死快阿賴耶識藏無明十  
八界纏繒網蓋貪嗔癡常在在心境空花分內外不知四  
大假成軀妄執六塵增渴愛迷此心有三界大地茫茫誰  
曉解依師戒定學看經聞道真空即生恠世間物無不壞



唯獨法身鎮長在毛吞巨海有誰知芥納須彌實竒最本  
無外亦非內心法無形無可對假施七寶滿三千道眼未  
開心不會莫說知休談解自有驪珠不著買用無盡處示  
衆生識不破人還自背聽語言為教誨不脫聲聞生進退  
刹那一念入魔群萬劫虛招無間罪本無縛莫求解祇這  
靈光終不昧大無邊表細無塵圓覺一輪如意袋

摩尼歌

一顆摩尼非玉貝不動隨機方便快無邊無表實先天亘  
古迄今無覆蓋六和同心不在放蕩汪洋塵世外箇中無  
可表真如不滅不生誰不愛卓頑空立世界非界非空有  
誰解返已迴觀一物無光大圓融含百恠珠體堅百恠壞  
幻化元空靈本在三十年看水牯牛祇箇為山實竒最華

林子通非內踢倒淨錡絕待對天上天下獨玄靈直至如  
今少人會老南泉逞見解提起猫兒人不買一刀兩斷不  
曾分主伴重重元不背了非言聞妙誨鑽火逢烟莫放退  
忽然杲日爍冰霜不立微塵誰受罪天網恢非結解遍布  
彌漫這三昧堪笑衡陽沒量人彌勒光中拖布袋

十二時歌

誌公大士遺十二時歌警二乘著相馳求提沉空滯  
寐不了普庵老人於斯誠言百千迴絕妙在無言  
之說得意成無盡之意徃徃玄通斯人鮮矣哉誠既  
夢覽之為美不妨寐語續其宗須還鼻孔遼天底點  
首知空與我同志歌曰

平旦寅鷄鳴犬吠足圓音祇這圓音無二聽何勞妄想別



求真擊鐘鼓了無聲了本無聲真好聽聲銷無體門前  
客體合聲空箇裏人

日出卯齋粥無心不覺飽鉢盂洗了自閑閑方信趙州機  
便巧師子兒全牙爪驚殺百年老虎豹捏恠文殊劈腦  
騎二乘皆道莊嚴好

食時辰金牛作舞笑忻忻漆桶漆桶喫飯來參方誰識老  
婆心佛祖意只如今且無自己及他人雪峰指作一面  
鏡輪劫獼猴佩苦辛

禺中已報君學道無門戶佛語諸經標此心此心現時寂  
滅度本無迷曷有悟真我非身誰作做貪嗔癡愛屬衆  
生達者無非涅槃路

日南午大地元來沒寸土天上天下獨為尊耀目連睛無

可觀石鞏癡逢馬祖自己如空誰射弩三平了道劈開  
胸不拄箭鋒徒自苦

日昃未擔板玄沙愛驚鼻喪身失命幾多人張口送晴何  
處避不通宗渾寐語業識茫茫無本據盲參不體弄蛇  
人常被弄蛇穿却鼻

晡時申衙鼓夔夔妙意新拈地該天人不會如飄野馬入  
迷津不取相勿踈親露體堂堂絕翳塵屠兒一念無諸  
業龍女逡巡作佛身

日入酉萬戶千家無別有相呼相喚去還來誰識一身非  
妍醜也無頭也無手劫火洞然渠不朽猪羊牛馬化為  
真毫髮不留無可守

黃昏戌更點分明黑如漆一道常光絕世倫來往不通金



密積知不知識不識自古至今非外覓木女清宵何所  
為混月閑吹無孔笛

人定亥墜石癡人猶擣碓忽然春出古菱花照地照天無  
向背今時人會不會未了先須除渴愛情忘想盡至無  
依體若虛空非內外

夜半子萬事無心誰到此一毛頭上了徧圓永劫不遭邪  
魅使昇高臺搥大鼓努目搖頭如老牯猪羊咬盡更傷  
人自己不真長劫苦

鷄鳴丑飛空著地波波走演若達多再得頭依前不換舊  
時首無不無有不有有無不到休開口拈槌豎拂有誰  
知逐跡尋臊真獵狗

頌石頭和尚草庵歌

石頭和尚草庵歌試問叅方會也麼千萬莫將茅瓦比離  
鈎三寸綽清波

吾結草庵無寶貝日劫相陪誰曉會只緣窮子不歸家未  
免出頭來捏恠

飯了從容圖睡快杲日麗天無可曬薄削輕霧設虛空飽  
塞虛空全不柰

成時初見茅草新權披百衲強看經賴得藥山重決破別  
傳一句醒人心

破後還將茅草盖雨過風吹無罣礙垢衣那肯便拋遺切  
恐衆生難理會

住庵人體露堂堂非故新毫髮有差魔道種一塵不立妙  
通真



鎮長在不是坐禪并禮拜實相元來豈用修越古超今含法界

不屬中間與內外獨卧孤峰誰作對龍天百萬有誰知金色頭陀笑裏會

世人住處我不住布施生天終陷墜靈光獨耀更無餘未達凡夫開眼睡

世人愛處我不愛樂是苦因宜早退六道四生何日休唯大丈夫能氣槩

庵雖小寂寂寥寥勿邊表於中獨有一天真透色融聲常皎皎

含法界大地須彌巖一芥外道聲聞永不傳究竟不如心自解

方丈老人相體解一默全包無小大曼殊贊歎實希奇問疾不任知自敗

上乘菩薩信無疑為法忘軀世所希粉骨碎身應未報聲聞小果卒難知

中下聞之必生恠泥有著無生死快改頭換面去還來歷劫茫茫虛受鼻

問此庵有誰直下肯承當不假良材并巧匠重重帝網妙嚴莊

壞不壞百鍊金剛充法界微塵不立似虛空始得名為觀自在

壞與不壞主元在得者拳拳應不昧娼坊酒肆轉光明絕類離倫何窒礙



不居南北與東西萬法無生何所疑  
岩樹庭莎標妙相猿啼鵲噪應真機

基址堅牢以為最百億輪鎚擊不開  
定慧圓明非我所方知達磨不曾來

青松下珊瑚遍地誰知價無限  
聰明只道空問說真空沒命怕

明窓內晃晃絕塵無覆蓋  
指作菩提却不真自頂門開全領會

玉殿瓊樓未為對引惹衆生增渴愛  
放出瀉山水牯牛爇爇露地難遮蓋

衲被蒙頭萬事休九年面壁為迷流  
神光斷臂何希有薩埵投崖飼虎求

此時山僧都不會猶若太虛無  
內外臨時應化即非真取相馳求還自背

住此庵不曾焚爇有為香終日示君君  
不見更無餘事可思量

休作解衆妙玄玄無管帶文殊仗劍逼  
如來五百聲聞心豁解

誰誇鋪席圖人買不用文章兼學解  
打破虛空歸去來離世界方入法界

回光返照便歸來鼻孔遼天眼豁開  
元來佛法無多子連袂三拳打自豈

廓達靈根非向背不關南岳與天台  
父母未生前一著香巖擊竹始迷開



遇祖師不契玄機道愈踈靈知不是目前法目前無法可名模

親訓誨鈍斧開山百雜碎不求諸聖入玄宗雪點紅爐方稱對

結草為庵莫生退百鳥嚙花也不來花開還被風吹落不得春風花不開

百年拋却任縱橫隻履西歸表不生來往本無常湛寂心相印號傳燈

擺手便行且無罪汝等衆方莫錯會千古萬古一光明不動遍周塵刹海

千種言修多羅教設蹄筌魚兔得時非在說商人到岸不須船

萬般解筆寫石鐫處處賣不將一字與人依露迥迥兮赤灑灑

只要教君長不昧觸目無邊無對待行住坐卧是誰來提却蔓菁覓菘菜

欲識庵中不死人幾迴昏暗又天明明暗不來渠不動周天卍地等空平

豈離而今這皮袋心法無形如大海汪洋不宿死屍骸萬古騰輝無變改

活人歌

大聖靈驗普庵圓廣施含靈遇有緣信心清淨通靈感萬病俱銷釋業愆文殊體用普賢活人歌裏現金仙藥王藥上非他術扁鵲孫真共一言今三服淨水煎莫將血味汚



心田萬物有形皆我體但行慈德解離冤內無想外無緣  
何必神方肘後傳身心本是金剛體不解觀心被業纏藥  
病銷心月圓信時佛豈獨西天在在處處人皆有世間無  
比這靈源除臯垢脫百冤解使昏衢朗義天信知非我誰  
為病大士維摩笑裏眠衆生病我不顛體沒衆生我病痊  
不二法門誰敢道金毛師子露身全速投藥解塵緣莫學  
群迷眼似攣隨機應感非難易信手拈來不用錢

洪鍾歌

因李昭文施財鑄鍾作

昭文昭文施一鍾懸空隨叩警盲聾圓音不斷周沙界純  
體金剛空不空雖含響擊即通十方諸佛應聲中天龍八  
部生忻悅外道魔軍失却衆此圓器大神功上祝皇王壽  
不窮日月長輝邦國靜臣忠子孝續堯風昏者醒愚者聰

民歌鼓腹意和濃地水火風同一性刹塵無間體含融包  
聲色印頑空鳥樹岩巒風月同秦時何必驅山鐸大振金  
鈴總脫空時節至自相逢肯信無心達本宗和同一族輸  
金玉回向南泉鑄此鍾黃昏裏五更中下下無空徹底通  
近祖遠宗迷識解聞歸淨土禮金容涅槃侶契心同箇箇  
全音讚此功顯理揚真無二聽含靈蠢動一時通受者法  
施者空且無地獄與洋銅孝子順孫光遠慶昭文千古振  
家風

開鍾示衆法語

總中有別異中同成壞非干這一鍾收拾油鐺并火鍬圓  
鎔法器濟盲聾以手指鍾云大衆還識此物麼良久云不  
可以智知不可以識識要得真實見解麼這箇不從天降



地降亦非妄想發生孤標越劫不曾生獨卓超功不曾滅  
夢見衆生背覺不免敗缺一場拈黃葉而止孩啼立假名  
而標佛性會萬物成已而不著諸緣用大冶一烹而鑄成  
全體若到這裏且不用三乘爐鞴又豈消十聖鉗鎚自然  
一氣遍周羅金汁融通無間阻若遇知音之士何須剖擊  
始通真箇中未曉之人不妨下手善男子無奈下手處諸  
佛護持龍居無頂而牙爪森羅八角橫彰而金文厯落既  
到這裏不可埋藏大家聞了莫生疑只這無聞全自己遂  
拈鍾鎚薦顧視大衆云 諸佛子勿不得錯會各各運心諦  
聽 遂擊一鎚放下鍾鎚云 欲解不思議鍾聲裏薦取珍重

學無學頌一十五首

嘗聞學道不依形道不依形不離形不離不依猶寐語尋

思寐語本天真

休道這邊與那邊得時何更有枯偏有為無為皆是夢夢  
中明白體如然

莫向人前說是非是非不到實希奇假饒講得天花墜大  
地山河總不知

戴起枯骸撞眼睛燒香設拜甚精勤一盲引衆誰人會賺  
誤世間多少人

病在己而過在師脫師離已悶胡蘆從前學解皆忘却撞  
頭磕腦愈心麤

實見菩提說甚禪大家打關過殘年相逢道伴何言語無  
價真珠不用錢

達磨西來腦搭披少林久坐若頑癡如斯顯赫非今古唐



土生靈誰得知

老盧得了不傳衣後代兒孫切莫疑衣法親傳兩不是心心心印了無知

五家宗派亂縱橫未到玄門語默爭誑謗自招無間業直須全體墮深坑

奪下生機不作聲耳聾眼瞎妙明生隨流只欲傳心印豈是緣情粥飯僧

昨夜三更日卓中滿天星斗雨濛濛三門佛殿相携手要去西天路不通

翠竹山茶映落霞猿啼鵲噪道誰誇一葉墜時秋遍界春風微動一時花

悟人寂寂心寥廓迷者忙忙到處錯普觀迷悟實無因祇

這如來大圓覺

周歲孩兒八十翁若觀老少絕宗風衆生世界本無有妙在當人一性中

十方世界口相吞不斷圓音說普門唯有普庵知說處一箇窮人不著裨

天龍岩寐語

天龍窺聽魔族魂銷塵刹毛毫普庵不二為什麼開庵來至於此是故水月空花現形應物若得學無學士臨機而不著言詮一悟普聞妙解而豈俱聲色老莊之言不到佛祖之句難傳應如是知權名實相實相無空無不空將不空執尚違宗一多無位誰分別萬象森羅一鏡中庵本非庵開不開靈知自性即如來尋源窮處烟霞伴南嶺風光



近日回上無片瓦下無錐被喧卜靜了無依多求欲叩無  
心者既了無心豈是非若將色見普庵人未免隨流不契  
津千里無來同受用縱橫妙用自家环莫恠渠儂不出頭  
了心非相永無求相逢誰覺夢中夢浪靜閑乘般若舟

頌十玄談并序

至人無已神人無功雖無已而無形不已雖無功而萬化  
皆通道法自然唯靈獨用用則非用通則全通若未全通  
疑心未盡心外餘絲疑祖道豈能全夾山聊顧存師德絕  
勝華亭下水船如今要問西來意深知寐語落頑禪同安  
大察禪師遺十玄談詩於世嘗觀處處開彰徃徃究其味  
者斯人解矣可謂字字透宗不留跡言言見諦以無私同  
世迴潤之言談入俗轉機之操要不遺平側韻對無枯文

章不立事理皆無十題豈似於世間紙墨不傳於耳目除  
非見解可覽金章多學強聞伊渠無間者方信普庵老人  
寐語非虛唯心自肯今於一句之下加頌之三今古混融  
成八十首頌既已畢猶恐學者未察於題二十字為十法  
界之因八十句為八解脫之藥病因藥瘥敢問其方救未  
來之衆生起河沙之妙慧是故先題而後誦從本而顯末  
本末雙彰唯其察禪師也普庵向頭上安頭須還知之不  
知者即道如如

頌題

心心非不心未得印時生死侵除非一搭無纖翳六道皆  
標我相形

心印也

祖祖如鍾鼓未擊有意周天普虛幻形聲本自無如如不



動亘今古

祖意也

玄玄不用言機鋒相拄箭頭連達道無機玄不滿儼侗真  
如有萬千

玄機也

塵塵背覺勞生地獄因鏡寫異形分皂白合元一性自天  
真

塵異也

演演莫執文書案上展教人戒定慧堅牢知見解脫堂堂  
顯

演教也

還還不消下水及登山左右逢源名實相從斯周而卧雲  
閑

還源也

達達遍滿河沙微塵刹本來無語似陽春雨過花枝連夜  
發

達本也

迴迴目擊心通處處開機深體淺無人會滿天風道我如

來

迴機也

轉轉兩頭不著中心選無位真人是阿誰佛祖鼻孔穿戒  
串

轉位也

一一恰似大虛經鳥跡色即是空空不空度日長吹無孔  
笛

一色也

頌詩

心印

問君心印作何顏影現千潭印萬山夜靜畫樓吹玉管聲  
聲相應絕遮欄

心印何人敢授傳無師弟子佛衆生幾多妄想成恠覺執  
境迷心拜衲僧

歷劫坦然無異色東西何立誰南北若言別有一靈光認



子不真元是賊

呼為心印早虛言滿目真如自現前十二時中無不應金  
鷲頻道柳含烟

雖知體自虛空性如理深淵融一鏡萬象森羅沒處藏摩  
尼離垢常清淨

將喻紅爐火裏蓮精金百煅轉光鮮居塵不染隨宜用始  
覺松風解說禪

勿謂無心云是道龜毛兔角非堅寶頑空作境是誰安不  
體十方源浩浩

無心猶隔一重關滯寂沉空也大難啼問阿娘誰是母閑  
雲溪水笑潺潺

祖意

祖意如空不是空鵬程九萬力唯風若非風體空何用體  
得無空道自通

靈機爭墮有無功色空猶未達空空色本無權立號無  
名全體露全風

三賢尚未明斯旨羊鹿牛車孩子戲數墨巡行枉用功假  
立名為乾慧地

十聖那能達此宗要須歷劫道方通飢寒不認燈為火空  
守門前草屋中

透網金鱗猶滯水識神照覺非知己肯心鳥道即菩提三  
文買竭廬陵米

迴途石馬出紗籠嘶起寰中雨後風吹散暮雲孤月朗危  
巖烟寺一聲鐘



殷勤為說西來意得意忘言真不二昨夜三更穿市過只  
聞米賤油鹽貴  
莫問西來及與東焉知佛祖一空同四維上下皆如是爭  
奈凡愚執相容

玄機

迢迢空劫勿能收非相非名觸處周罔象無心珠自現何  
勞汨沒外馳求  
豈與塵機作繫留有為何日得功周除非無我無人見體  
用全通得自由  
妙體本來無處所超聲越色非今古詮題不及議難思莫  
恠道吾頻作舞  
通身何更有蹤由三十年看水牯牛鼻孔無邊難摸索醍

翻常納混春秋

靈然一句超群象不落聖凡無伎倆長笑一聲烟霧寬含  
虛寂照亡思想  
迥出三乘不假修別傳一句普天收揚眉早是相輕忽妙  
得無心了便休  
撒手那邊千聖外見知不與凡同會高峰絕頂棹孤舟海  
裏爐焚烟自在  
迴程堪作火中牛一葉纔凋萬國秋月朗浪平無別事此  
心只在釣竿頭

塵異

濁者自濁清自清一輪堅白不容塵鏡中妍醜誰分別水  
月融光淨法身



菩提煩惱等空平色裏膠青用始精  
鹽入水中尋不見舌頭輕點笑欣欣  
誰言卞璧無人鑒但辦肯心終不賺  
燎却眉毛尚不知詢岐欲往西天探  
我道驪珠到處晶包含萬有獨明靈  
同光索價遭人問兩手張開帽帶陳  
萬法泯時全體現大似金剛經百鍊  
定光鎔爍絕纖埃隻眼圓明何用見  
三乘分別強安名懸念群生習氣深  
寶所到時城假化何曾動步早觀音  
丈夫自有冲天志不著形名非與是  
交徹輝光意氣濃金毛師子真堪畏

莫向如來行處行一身墮落萬尋坑  
人神百億扶難起耳不聞聲目似盲

演教

三乘次第演金言義體周天應自連  
黃葉止啼兒不叫方知累劫困如眠

三世如來共所宣至今不斷少人傳  
塞鴻非是人驚起風擊蘆鳴寫碧天

初說有空人盡執未明理事虛勞力  
念來年久轉迷情心不負人徒面赤

後談空有衆皆捐字字無空透色鮮  
八萬法門從此入如今喚作老婆禪

龍宮滿歲醫方義藥病相當除五味  
攬草耆婆也大癡胡



言亂拔莖莖是  
鶴樹終談理未玄口中吐露白如蓮一花五葉親分付只  
恐衆生眼著癡  
真淨界中纔一念未離學地終須欠今生努力絕名言永  
劫不遭塵垢玷  
閻浮早已八千年朝夕忙忙被業牽一夢不驚席劫苦何  
如領取現光前

達本

勿於中路事空王鑽火還須金色光燒却三千并世界死  
中得活也無方  
策杖還須達本鄉未曾舉足見娘娘多時不隔如今面子  
毋連天笑一場

雲水隔時君莫住橫吞碧漢包天地任它物變景推遷獨  
我真如全定慧

雪山深處我非忘百一十城印普光彌勒樓開通線道方  
知臘雪似春霜

堪嗟去日顏如玉常和白雲空裏宿千迴萬匝只如然寥  
寥獨唱無生曲

却歎迴時髮似霜眉毛眼睫放毫光從前無理今皆道笑  
指泥途七寶裝

撒手到家人不識明朝更不分南北逢場作戲弄孔魂反  
指牛兒是彌勒

更無一物獻尊堂剔出銀盆耀雪霜筓前既離絃無退轉洞  
山收悔不思量



還源

返本還源事已差，輕羅不著外尋麻。勞慮即真猶未信，忽然解道見桃花。

本來無住不名家，唯有西乾路不賒。三度它心通敗闕，國師猶釣死蝦蟆。

萬年松徑雪深覆，水泄不通無入路。解脫門開一步周，喃喃寐語分緇素。

一帶峰巒雲更遮，倒騎馱馬過流沙。東西南北中央佛，共飲乾坤一椀茶。

賓主穆時全是妄，相逢迎送分堦巷。老胡不識警梁王，寶積摩尼歡喜藏。

君臣合處正中邪，名相和同體似差。一二不成三不是，八

還要顯我無瑕。

還鄉曲調如何唱，蝶拍鶯歌大道場。唯有禾山解打鼓，金牛作舞也尋常。

明月堂前枯樹花，太陽門下雪交加。寶樓閣裏多恠敗，達哩摩尼吽發吒。

迴機

涅槃城裏尚猶危，親到靈山未足奇。見佛忘知無我所，六根常動轉阿彌。

陌路相逢沒定期，蛇婆來命恠誰知。四十八人成鼉鼻，急喚頑禪草裏歸。

權掛垢衣云是佛，釋迦也似偷空賊。忽然捉敗不相饒，丹霞裏純金色。



却裝玕御復名誰更展琅函耀本輝了道不除權立法一  
切元體是無餘  
木人夜半穿靴去得意生身無住處妙用難傳妄想心知  
君未解通方句  
石女天明戴帽歸一身渾著六銖衣喃喃解說非聲舌生  
得兒來叫阿姨  
萬古碧潭空界月猿啼徹夜何曾歇幾多孤負一輪光唯  
我同輝誰辨別  
再三撈摑始方知投影逃形也太癡千眼大悲分得半維  
摩老漢始全提

轉位

披毛戴角入鄽來水底桃花幾度開世界未生唯此性任

他遷變豈輪迴

優鉢羅花火裏開方知達磨不虛來夜來一霎清明雨萬  
卉千葩勝剪裁

煩惱海中為雨露窮坑變作玕珠庫可憐不識夜明簾打  
破畫餅無作做

無明山中作雲雷閃電霞光爍不開霹靂一聲山嶽震曼  
拏大士笑哈哈

鑊湯爐炭吹教滅一日三餐飽便歇獄卒牛頭惡夜叉同  
氣連枝應不別

劍樹刀山喝使摧十波羅蜜印靈臺光輪無盡矣邊表不  
是貪嗔報得來

金鎖玄關留不住穿雲透石充寰宇四時不語信寥寥萬



劫超然希伴侶  
行於異路且輪迴百億分身撥不開地獄天堂非別有相  
呼相喚隱天台

一色

枯木岩前差路多不行鳥道轉設訛狐狸引入豪猪窟不  
久成團被死魔  
行人到此盡蹉跎一指頭端不柰何毫髮有差千萬里為  
山撫掌笑呵呵

鷺鷥立雪非同色鏡裏色空誰間隔不是青黃黑白紅上  
下東西及南北

明月蘆花不似它於中一氣通天羅涅槃影裏無相識鼻  
孔遼天笑大哥

了了了時無可了乾坤道我無邊表夜摩宮裏混金風兜  
率殿中明皎皎

玄玄玄處亦須訶喝斷烏江返碧波寄語東吳諸父老不  
如聞早念彌陀

殷勤為唱玄中曲澗水相和音韻足唯有伯牙欲露機斷  
絃深意無人續

空裏蟾光撮得麼待風列子已蹉跎須彌無縫徒伸手任  
是先天不柰何



粵以垂世立教豈曰乏人顯本標宗莫偕斯典實歲經  
之耳目誠佛祖之果源恢恢寶劍而瑞氣莫渝粲粲明珠  
而清輝難掩以彭逢源彭褒彭大霖李寔李觀國等親聞  
如是敢不揄揚共施家珍命工刻木用廣發揮於後世庶  
幾有補於將來為萬古之徽猷作吾宗之真宰知

普庵之應世乃古佛之再來可謂千載一遇也得誌之于  
後昔歲乾道二年季春滿日參學弟子和光應世拜題

### 化米

當關擊破黃金鎖佛與衆生無兩箇全提吞盡十方空萬  
億龍天為護佐雪歌獨唱古峰頭風月溪山同讚和從來  
弘闡在當人密賴知音共揚播共揚播非彼我一鉢千家  
宗善果直叩維摩不二門狹路相逢休放過○

### 買油

三百六十一斤油何須苦苦問它求心光廓徹燈何用水  
草無心若畫牛五味舌頭無足日煎熬煮炙幾時休功辦  
斯成無點漆西江一口絕纖流

### 行童搬土

童子聚沙為佛塔而今搬土豈無功忽然覺後知非土當  
處回頭識本宗老僧念你善根微所以教伊不失時朝歌  
暮擊三摩地不久迷開解我機

### 普請道友搬瓦

當時驢覷井如今井覷驢酒醒溪邊思往昔至今方覺彼  
區區空花解弄迷兒路蝶引癡蜂入網蛛誰是那頭能警  
叱回光返照越賢愚雲蓋瓦鋪須子細筆端有口顯文殊



唵玲重

鐵竹歌

普庵和尚鐵竹歌十聖三賢不柰何九節玲瓏通法界不  
由蓮筍自嘍囉從百鍊已經磨能障狂風止海波惡龍攝  
毒皆由我猛虎歸降豈是它世出世間無可比非凡非聖  
力摩訶莫耶劍比天戈生滅勞形費氣多只這一條剛不  
壞撐天拄地應三摩身瑩淨意曼陀非眼耳鼻六通和肉  
眼那能堪作見二乘天眼尚說訛德山漢却老婆橫豎宗  
風般若多罕遇其人難措手至今獨卓立巍巍君不見莫  
蹉跎點石為金也是它即粟橫肩千萬箇解吞鏡竹可相  
過未動口時百雜碎豈同狐族唱巴歌順天助道功非細  
只欲令人脫死魔喃喃解語非關舌入水何曾動碧波鏡

竹自歌如是唱海潮音微笑呵呵

拈碁遊戲三昧禪

這箇初因戒定然後觸目涅槃當觀妙用縱橫蹊徑權分  
四九一白二黑無名天地之先落二落三有名萬物之母  
玄之又玄衆妙之門何室礙迎之隨之自活方能無失錯  
為什麼如此雙關難破抑亦須成一道常光隨精明密釋  
子道孤孫展脚官人於象鼻巖機癡人徒闊角偷忻然則  
終無解脫智者存腹寬海量快活無憂傷嗟拈子細包覷  
面還如不識破籠輕罩不覺不知只欲打劫逃生多虛少  
實有忌有諱怕人漏泄頑機磕額撞頭到處離披裂瞥君  
不見爛柯仙一局知它幾度年自出洞來誰作對未曾舉  
手早贏先高不高玄不玄默然輕轉不能言得失都盧無



箇事一時收拾華堂前若人要問甚消息落落真風印碧天

數珠歌

如是數珠祇一顆離垢摩尼光不破佛說刹說衆生說三世一切說這箇未了人休將過成佛人希念佛多却將妄念數如麻念來年久却成魔假慈悲當什麼順時吉逆時禍行住坐卧似風牽誑謗佛法如行貨木棗子麻穿過假名一百單八箇和酒和肉耀心光誰覺死來連汝墮心念肉口波波業識如斯怎奈何靈府未清徒念佛身心淨土自彌陀旃檀成來惠我拈起連天笑一和自家不比這般人黃葉止啼元是我聰明人猶較可二乘聞說心如火幾百劫中用數珠今日教人都訣破善男子不恁麼法無斷滅言無過一人道假百千虛何不學西來達磨不立文無

唱和寂滅光中神護佐九年面壁沒人知直指人心少林坐雪齊腰割臂墮猶自惺惺不放過徵詰神光勿得心忽然解悟方擔荷報衆玄休懨懨決擇身心是什麼虛空何物可相當體得一如閑打坐十方諸佛念珠同法界圓明無兩箇

引彭仲和心齋二居士拈永嘉證道歌

夫證道歌者實諦難思議妙契不可說大好取不得舍不得是什麼不可得祇麼得得箇什麼若有所得然燈佛不與我受記汝於來世當得作佛號釋迦牟尼若實無得然燈佛應與我受記作佛如理實見我道然燈佛不著兩箇頭是一箇人是知百千萬劫過現未來一切諸佛皆悉知是除一心法門之外別有得者盡屬外道邪師聲聞緣覺



有為著相泥文字求知見妄取殊勝欲現神通貪名苟利  
能所不脫目前鑒覺未破不契宗元忘前失後住有為而  
說無為著有相而談無相見箇真實人略有一言半句面  
便紅赤口似啞羊手若風牽無本可據業識茫茫擔定一  
百二十斤屎桶檐子不肯放下道我學解超過人法自埋  
自蔽我慢增高誑妄無知令他邪見永失本心我佛門庭  
誰曾踏著所以永嘉大師與十方諸佛無二說無二見無  
二心無二佛無二法一切不二究竟如是便道諸佛法身  
入我性我性同共如來合一地具是一切地非色非心非  
行業彈指圓成八萬門剎那滅却三祇劫若悟自心是佛  
更說什麼佛及時剎剎土莊嚴名相學解殊勝知見此心  
法中若有一塵許未是本心不為法身喚作心外有法未

得圓覺圓者無漏覺者無空無漏即無為有漏即有為無  
漏無為真實相有漏有為凡夫法覺真毫髮不成空妄覺  
頑空陰間夾終日圓覺而未嘗圓覺者凡夫也凡夫不知  
自己身相從本以來唯一圓覺廣大清淨法身妄認四大  
為身六塵為心惡死好生迷背本心不得受用成佛永劫  
不壞之身若聞見性成佛便興安心別求知解豈不是騎  
牛覓牛將心覓心使佛覓佛無有是處何如直下承當全  
不費纖毫之力所以道終日圓覺而未嘗圓覺者凡夫也  
凡夫是假名以要言之將妄顯真令歸悟體即一切佛一  
佛一身多身一相無相方可一了百當如今出頭分踈不  
下設言言見諦字字歸宗早落第二機明眼人聞豈不相  
笑哉何況未得謂得未證謂證瞞昧凡夫自欺佛理萬劫



千生墮此惡轍誠非小事佛語不虛果報歷然信者信自  
心清淨即得作佛不信者背失本源永沉苦海生死何休  
我說本無說君知本不知如如方合道合道不思議蒙妙  
意為拈出永嘉大師三關不覺潦倒哆哆和和又與麼去也

示弟子彭資深心齋居士

靈山話月曹溪指月禪可禪而成大過一念頓超沒量人  
六月雪哥向猛火叅方侶休打坐學至無學得什麼自從  
打破趙州關收放縱橫句不墮這雪曲誰解和舉意萬機  
無兩箇拈題頌古若河沙須是金毛師子子這資深被誰  
苦夢中踢殺千鈞努射過山河石壁空枯體爍盡無纖阻  
希奇希奇誰得知心空及第心齋子古賢無限學無為罕  
遇明心輪劫苦聞不聞豈小補識破天下老婆子箭鋒相

拄道應難針芥相投萬事閑不知佛祖只談心悲愍盲叅  
往別山沒絃琴誰會彈盧公便就指風幡直饒不是風幡  
動不識真心轉見難我意無盡非言說離百非兮四句絕  
首觀梁武夢胡僧未達修山龍濟決一百一十四重玄大  
冶爐中撈片雪生不生滅不滅萬法千機誰透徹普庵不  
舍一微塵本末雙彰無說說肯將法界作紅心一箭虛空  
渾漏泄

行者圓通求僧法語

師云諸法從本來常自寂滅相常聞楞嚴會上我佛垂言  
阿難當知妙性圓明離諸名相本來無有世界衆生因妄  
有生因生有滅生滅名妄滅妄名真是稱如來無上菩提  
及大涅槃且夫涅槃者寂靜常樂真如實相除非真正見



解便為妙會佛出世者元無出入名相無體道本如如法爾天真不同修證只要虛閑不昧作用不涉塵泥箇中纖毫不盡即為魔王眷屬所謂等妙二覺羅漢辟支緣覺聲聞削髮披緇頭陀苦行皆是權接迷妄衆生令歸正道設有顯現神通百千方便故得一相無相一身多身以法界為道場化群迷而為佛事是故法華經云唯此一事實餘二即非真普庵老人自解活計之後了本無為日用唯以佛之知見示悟衆生以為佛事十二時皎皎地無絲髮許作得間隔不動道場遍十方界忽因憲公禪匠全道智人夜叅之次告師云和尚抱道之士常不肯於應緣往返辛勤孰可忍乎可以告懇十方檀信求化進納一人能了事者待克有請修奉祈禳庶幾衆學者早晚得不空過免滯

機輪可乎師默然不荅良久噓氣一聲云不是這箇道理老盧得法非僧相龐老通明豈離家大事未成俱業網除非了本是生涯諸仁者此段大事從來千聖不曾踏著若不達本明心妄覓一片袈裟裹却一箇凡夫身剃了頭受却戒謗正法虛貪信施受人供養成諸大業永墮三途萬劫千生不得出離誠非小事老僧實不敢妄為大難保任大難承當又云好好這裏若是箇喪身失命自肯承當者出頭來對得老僧寐語者便可披衣剃髮了本有什麼交涉時有行者圓通出云行者呈似一頌伏乞和尚提撕師云速道通云和合無二性圓融大智鏡對機何阻隔靈光徹瑩瑩師云你鼻孔只今在什麼處荅云誰敢承當師云掠虛漢鼻孔尚不知却道要為僧且不管設若未透玄宗箇



裏終須無別汝能如是不顧存亡日用自然即事即理都無罣礙普庵與你共一手作出一隻眼該括塵勞融通一性弄有作無將虛為實莫令撞著箇鼻孔遼天底人略有  
一言半句相問直得通身是口及乎到這裏也分疎不下汝還知麼有麼稜禪師云萬象之中獨露身除非自肯乃  
方親昔時謬向途中覓今日看來火裏冰應須與麼方有少分相應普庵即今不懼明眼相笑這裏下箇注脚心月  
孤圓時光非十五六迷者以圓觀智者應妙觸印危崖鑑川陸一性圓通無委曲了非心外逐塵緣下坡不走天然  
速誰道速有佛之處不得住無佛之處一時足時來錢解放光明運至石頭成白玉幸逢施主大開張古佛慧命汝  
今續

進納

大道等虛空離諸名色相諸佛不出世亦無有涅槃若不透達玄機未免拖泥帶水如今若要超凡入聖打鳳撈龍直須捋脫頭毛橫肩一衲造箇無縫塔子騎隻露地白牛  
休說飲水分河這裏要須明白圓通圓通當陽顯赫但存一片報息心大施門開無壅塞

袁州開元寺塑佛

右伏以金身丈六應化非真萬德全彰色空不異兜率未下早降王宮未出母胎度人已畢雙林示寂而本光不滅法性常存毗藍現瑞而生即不生天真圓湛三十二相而非相不妨萬行以莊嚴八十種形而非形到裏許者解非非色無法可說而說法海藏五千道不可言而常言燈傳



無盡是以雲門不肯放過且圖天下太平丹霞火煨無疑  
人人有分隴西達士重標立萬行圓明道果成舉目含靈  
俱是佛應無所住得其心

與圓定書

圓定不病此病非定斯有我名辯故如是我亦如是如是  
如是不可思議此中事理一目無漏故不可說幻在其中  
非妙明寂照體用雙彰智悲同運之人焉能信之應干觸  
目以此物祇待必無咎焉狗子無佛性打殺了也且作麼  
生分別趙州這一箇無字也常向諸人提撕早晚不可放  
過大乘徒侶焉比凡流顯則如呆日東昇無物不照隱則  
如晦月在雲定知其有可以道化自然莫生私礙出入無  
非動靜一實慮有魔恠忽起好惡細微現量彼自銷鎔覺  
元不動三世如來奇特十世古今尊重究竟事成更察於  
中懶惰者遣歸亦不妨老僧近來杖頭生眼應不打死漢  
知之全用心齋無心總攝於心餘無可道

示彭昇伯

驪珠一顆印千峰越古騰今處處通元禪道貫纖毫絕方  
知佛法不曾窮孤雲片片標心法野鶴翹松表自容千眼  
難觀誰解見赤幡直下起清風妙覺十方無影像靈知三  
界絕行蹤所以不墮往來之機不墜中間之意真如凡聖  
地獄天堂須還了事底人眼前鑑覺自破一微塵也不立  
權法義修羅迷指不見月兩處大請訛來叩普庵老真心  
豈柰何除非君自肯陽春白雪歌毛端如未識言說用閑  
多情忘并想盡不斷這摩訶嘆○仁者且道這箇是什麼



聰明不敵死生關，乾惠豈免輪回苦。到這裏更說什麼前  
程禍福身命因緣，自性本淨妙圓於中，且無別物。虛空猶  
從妄生，何處更有這箇消息。雖然，如是不妨隱顯其中道。  
有說無也要君知，落處色空不異智。人應不它觀，是以今  
時重加寐語，願軒願軒當處湛然。萬法歸一，不勞外覓。無  
心合道，貫離微大用堂堂，無不吉。

回瀏陽縣資福寺書

某稽首瀟湘古岸，徹底騰霞向蒙飛錫。未餘旬一軸琅函  
空裏墜，未展觀祥光而遍界。金風深知唯有箇中人妙意，  
筆端資福事古賢憂道。豈憂末事難成，若是當人何愁這  
箇不了。某空花標相水月談禪，以法界而為道場。化衆生  
而作佛事，君禮耳順而性純一。雖為外道之所惑，已覺其

非明自心之所得，而無所得出家漢。但識取心無法不備，  
既是得心而明本隨方。而應法非真大事圓成不動，而化  
周刹土達磨西來，且不做屋普庵入嶺。豈欲焚修一輪秋  
月，暎悲風數和松音標此意。因緣究竟莫勞神時節到來，  
無不備所有現在無不證明可宜。自把釣竿免被小蝦戲，  
弄經云雖是善因能招惡果。木匠休愁無酒肉，大家免得  
落群魔。但管來年了應教不動波，随心做箇殿別事莫多  
羅。更有一般好只箇阿彌陀。

化齋糧刊注心經

摩尼無價希逢，辨寶商人窮子背玆。蓋為久迷歸徑，若遇  
奇友指珠不離於衣中。信善思修不日還家，收寶藏此心  
經括大藏五千餘卷。只在凡夫之心，凡夫若解此經又更



與佛何異須是依經契悟直截根源不可捋過數珠將為  
看經已了又更燒紙化疏虛誑作福招殃若會佛說處非  
有非無便解普庵解注若了自性如空無相生死喚作涅  
槃超它千古念文章當下一聞便解脫不可容易須當信  
施齋粮然後請經也要心經堅固甚幸

達理歌

普庵識心達理不是胡言亂語教化三千大千箇箇透泥  
入水應無所住生心更不祭神拜鬼時中淨念法身何假  
燒錢化紙不被邪魔所惑各各盡淘真理亦非夜聚曉散  
亦不遠尋山水亦不發願燒香亦不棄離妻子不啗衆生  
血味便敬六親九祖誓不飲酒猖狂不入牢獄苦楚見利  
便不干心處處如欽父母你爭無明人我我自無可作做

修橋布路隨緣身作山河國土供養大地含靈上願皇圖  
永固時時風調雨順日日民歌樂舞皆因自性天真永不  
入他門戶如今一物無求不著邪魔祛使不離當處湛然  
運水搬柴佛事何須打鏡擊鉢豈用槌鐘撞鼓饒舌合掌  
皈依早被衆方取怒只心普遍蓮花何異西方淨土自古  
本自無迷今本何曾有悟設有三乘五教也似添鹽和醋  
生死涅槃如夢佛說無所作做更問達磨西來它亦別無  
門路直指人心是佛不可更移一步纔有絲髮是非便入  
魔家邪戶死中得活之人諸佛龍天守護斬釘截鐵丈夫  
這箇凡夫了事如今人費神欽萬劫群靈仰慕到此若不  
回心豈識摩尼寶庫自利利它不竭經劫且無怕怖披雲  
嘯月吟古風透石穿山談正法只箇心如攻畫師只箇身



如無縫塔東村老婆是我娘爺是南門張大伯

紙被歌訓行童

佛以大慈悲示諸含識方便門蓋緣蠢動含靈皆一佛性耳只為情生智隔想變體殊流浪四生輪迴六趣五百生死遇一聖人若契無生永超苦海遇之不識迷妄轉乖只欲惡死好生不覺披毛帶角纔離人相念水草以逃生一失人身萬劫難復大若垂天之雲細若微塵螻蟻念念煩興剎那生滅是知佛說三界唯心萬法唯識識如夢幻夢覺真存今嗟汝等性本天真迷斯流趣今遇普庵出家求最上法乃是宿因亦非偶然便能割斷愛緣來親至理圓覺經云若諸衆生雖求善友遇邪見者不得正悟是則名為外道種性邪師過謬非衆生答若見色聞聲而求我者

汝自邪行豈干我過大抵只要超脫世人所欲之物拍瓦礫墻壁為真斬釘截鐵猛烈漢出家那有不成時箇箇灰心人人寂照若得箇中與大虛而合一體且喚什麼作法身便能全已無私解百億化身為我體任它東家作驢西家作馬大笑高歌誰明雪曲死生不變越古超今為了事人出家功德非微直是這一般人與普庵少分明契作我弟子許他千劫萬劫說法不斷度無量衆永為天上皈依人間瞻仰苟或未然且與普庵沒交涉如今各人受三皈五戒了却與你覆蓋一鋪可與對人天大衆分明承當取早朝晚夕東蓋西包行住坐卧子細看是箇什麼物若有鼻孔之子不在言詮若遇盲眼之人死屍熏壞我被了也說亦不知舉亦不解攝自乖離父母相背六親入我精藍



屎床尿僻十二時中喫了十方檀信飯著十方父母衣道  
又不修業如海水無明種性發渴何休智慧慈悲且無毫  
髮如今且為行童向後復作村人念念自業纏身死沉無  
間苦哉痛哉復歎堪悲諸佛出頭來也無計度你處好好  
去它家受飽糠食斤兩不少一一還是又復細酬且無閑  
人相待千萬各自努力若老和尚亂道承當不久入地獄  
永墮阿鼻若在這裏莫空度時日玆重歌曰一片白雲掛  
在身披時不許染紅塵輕羅細想應難比重錦尋思未可  
親豈非顏色白如玉成現都盧只一幅紅窓妖艷見低頭  
六賊三尸盡降伏日充衣夜得蓋不長不短也不大世人  
問我何處尋蔡倫弟子將來賣纜買得將來披不許邪魔  
罔兩知解向市鄽遮雲雨要與閑人隔是非縱顛狂任落

魄披入村中人惡惡直饒紫綬與金章我也未肯輕輕博  
又曰皂袖寒袍入體儀霞光閃爍遶身飛或行或坐頻頻  
看或卧或眠每每披幾度入山游勝境數迴海上覓龍騎  
假饒千兩黃金貴難買山僧這箇衣

### 大圓智鏡

普庵非相亦非名達本忘情不見人孤月全收無意識桂  
輪獨耀絕纖塵三祇一念湯消雪萬行須臾火爍冰到此  
何勞聲色問共君本自鏡圓明若將銅器作天真背黑面  
青賺學人本性如空含萬物妙明寂照豈容塵山河石壁  
三春霧空色全彰六月冰智自圓明非我所不拘日月定  
光明

### 與叅徒辦事



仲元亨老慙懃圓淨此中大事雪曲高歌騎箇白牛兒漫  
空唱哩囉這家也舂米那畔爭打禾且道乘誰力天真大  
老婆近日南方諸道友斬釘截鐵自降魔運水搬柴無不  
是神通妙用顯摩訶一人辦力諸天供一會修來爭柰何  
移根拔樹非邪作翻有為無萬事和樓閣忽然橫碧漢人  
人功德無空過香積味憑知道者須教不少亦非多箇裏  
不消重委囑分明只是這弥陀普庵

因道友說陳搏打睡師警之

日當午有巴鼻莫似這漢打瞌睡精魄沉滯識神牽墮入  
三途難出離我這裏不如是眼若不睡諸夢除端然靜坐  
沒牽纏縱橫自在無繫繫學道人生慚愧普庵萬劫眼不  
閉鼻孔連天叫大哥海納細流通大意勸君修休退志坐  
斷乾坤無別義一條脊骨鍊純剛撐天拄地更無二這光  
明全體是充滿山河崇富貴明月堂堂皎碧天絕待靈明  
撒手去一事無心了便休祖門一句普天收離相非空無  
別是無聲之樂響啾啾

李光遠宅糴米

堪笑南泉老古錐住山情況了無依解使木人來買米和  
光風月正先知奇奇柳眼桃腮總是機寸草不生千萬里  
出門春色共依依癡癡三千不惜換驪珠若問普庵來意  
處光明遍而體如如

與湯亨老居士

香積厨中烹五味脚踏天兮頭頂地雖然頭角各分張未  
得箇人都了利不然亨老大慈悲一日無私和衆議南方



道友不偏枯到裏許人皆具備直教塞口併咽喉消息出門無不是

與李光遠化糧

達空為實解境即心方能箇裏接群迷始堪表作如來用古寺香花住持無數只欠一箇眼睛所以荒蕪日久今日道場瞬目法拍燈籠風幡不動仁者之心了針鋒而法身具足乃得高檀光遠儒風滿腹語默全通肯信無言如空入理觀山庵四來風合魚鼓難鳴欲得一飽忘千飢須會廬陵真米價求字與目共作緣馳莫令相遇本色人一擔須拈檐下動切希珍重

小師圓通頌兩首

此信寥寥誰得知風舞巖松千萬枝杜宇連聲聲不絕鷓

鴝啼處綠楊垂鬧市叢中全體露資深深入老婆機無心應物物非物如幻摩尼一顆珠通濟妙圓圓種智塵塵剎剎顯光輝方便一申非語白殊祥萬載不思議

圓通又示行童

衆行童諸佛子親近智人無彼此努力今生須了却萬劫千生從此止寧受山門一切苦得聞諸佛金剛髓金剛髓時時舉直教血脉通無底用無窮盡意周圍百萬陀羅皆出此布曼曼無住處隨時密用無它計入泥入水也無私轉不退輪三摩地

通寄諸萬行圓明精進奉持自心佛事



諸頌贊

贊三寶

圓光應現無心物大地山河恰似無驪珠一顆非非相信者權將作畫圖

直指人心親見佛何勞打瓦作龜文一片白雲橫谷口幾多歸鳥盡迷巢

迷悟本同光信時無隱藏幻空如夢體三昧覺華王

贊達磨

妙契觸目菩提誰觀達磨西歸只是老胡惺怪好與三十竹篋試問衆方知不知狂書早自落便宜（噓）也好與三十拄杖還有人敢下手麼試斷看

贊須菩提

伎倆全無始解空雨花動地泄機鋒欲求靜坐無方所獨步寥寥宇宙中咄

信士畫師真請贊

非迷非悟誰強名模無相三昧不受塗糊越色超聲無箇事連聲不斷念蘇盧眉芒動處千光合自肯除非大丈夫持心應不失謀事便忘真誰識元明寶虛勞幾度春因見普庵老示我體皆純但依無着性性幻在逡巡○咦

普目乾坤非外物周聞法界祇圓音含靈入我身毛孔非相非名何處尋寶陀觸目無人見妙體端嚴不壞金如鐘含響隨緣應見我方知識自心釋迦佛普庵光不二如來體不藏香花供養誰知有只在衆生心印堂

此法身無變壞鼻孔裏許藏三界水月空花點不成非相



光中常自在（嘆）

法空為座金剛為體擔板如癡脫空無底信心無二吞山納水

蒼天蒼天悟無生法談不說禪開兩片皮拈地該天如何是佛十萬八千

易盡世間顏色普庵頂相奚為等大虛空一體霧露雲霞表衣眼觀不見耳聽不知惺惺不昧了了何虧自解拈花知起處冷笑達磨更西歸用晦隱顯無勞失亘古亘今也大奇

示衆法語

鑛去金存百鍊周自從索價沒人酬騰今耀古非聲色曾共為山作牯牛

身若浮雲心若風居常不定在虛空忽然風捲雲無跡誰人解識主人公

大隱居鄧小隱山了心無事沒多般休緣到此磨塵垢絕愛終須耐歲寒百草上叅多寶佛鑿頭邊勘趙州關莫教一擊連天地震動坤維頃刻間

示楊仲質

誰識一微塵於中藏本佛時時常放光照燭一切物只許信心人在處無輕忽這回如未應不離金剛骨逢本分鉗鎚煨成非外物（○）

和光讀金剛經師以頌示之

道人看經不識字刹那頃轉千億部恒沙諸佛入微塵達本契經無作做



何州宜求頌

十力功高誰履踐何宜重叩普庵門玄玄衆妙靈知有自  
肯唯心聞不聞時信金剛通佛慧情忘想盡合乾坤夜月  
曉風消息滿希夷獨步道常存

破屋頌示衆

一箇閑身穿破屋風吹雨滴轉光明燈籠露柱時時舉只  
道以平報不平瑠璃殿上鞭金馬追風不及三脚驢吐氣  
急殺人良久云放過一着會麼平地起土堆大有人未許  
你在○咦是什麼

衲衣示衆

一箇閑身包萬有不能自把着針縫衆緣聚衲須微細妙  
相莊嚴一大通下下針鋒無不實條條線貫不空空連天

鋪地山和水一合圓成始脫籠更有一般奇特處岩前枯  
木笑春風

布衣示衆

老僧一領布衫勝過趙州七斤大秤四天門王扛不動汝  
等謬下手看只是直下要成就不許麤疎須是出入處一  
切人見不得方是好手脚未審末後句作麼生道咦快割

示徒

我有陀羅名解脫在在處處和塵撥莫令撥着箇凡夫何  
用剃頭并展鉢咦連妻帶子龐居士一時成佛都包括  
妄心不滅禍難除任向祈求卜大虛了道不消多語話當  
軒自有顆明珠半夜三更莫費油澄潭捉月幾時休冬年  
莫惹紅塵客家道安然體自周寄語門徒諸弟子得心安



樂外何求  
未得塵勞息須依善知識若肯慈悲學發願施心力入泥  
并入水莫作閑戲劇揚眉動目處法身無窮極於中習懶  
者管取沒飯喫趁隊只圖飽披毛無了日不信佛乘經逐  
末本却失咄哉大丈夫你乘誰氣力當本無我人貪忙有  
何益何似歇無明聽吹無孔笛五音六律全皓月悲風寂  
一聲宇宙寬箇中間的實和同為智身無物堪遮空奉勸  
草木影閑時急收拾

與夏國舅

白日上昇非偶尔刹那成佛亦如然箇事迥超聲色外恩  
光滿目意連天妙明廓徹非思量一受皇書遍普賢江西  
風月光無盡帝里真如萬德圓當處飲吞無不足護持祕

密不休年

與王巡檢號懶翁

佛法從來付宰臣今朝已遇大心人透明幻住超生滅鑒  
物無私佑聖庭良久云會麼達磨非為後瞿曇未是先當  
來無量劫懶翁得自然

與康維高

精通三教越禪機語默同風和者希巾地周天居士眼元  
來只在一毫釐又云且道毫釐有什麼交涉向道故非外物

資深和光初叅師求頌

同心實步叩南泉雲飾空岩廓杳然一室清風千古意自  
非聲色問玄玄

示行者



絕頂無人處融會六非難獨步依無住圓心豈往還深深  
妙在無言說莫教閑拍動風幡大事徹頭須進步白雲千  
里故鄉關

師觀弟子作頌題窓乃續韻警之

饒舌刀刀不透機臨窓一語更離披儂家自有同風事千  
里無來却肯伊自云通身是眼見得一椽通身是口說得  
一半要會南泉親切意無過頂後著一鑽  
石人擊鼓木人吹露柱親聞腦搭披如是圓音無用處閻  
公未肯便饒伊自云蒼天蒼天敗缺不少時來節到自解  
了了切莫妄想不許夜行投明須到不妨試道着還知有  
麼不道不道死也不道  
鼻孔遼天是阿誰權將雲霧作衣披迷悟本無唯一性你

全是我我無伊自云應如是還有過也無與你三十拄杖  
噓普庵三頌自連拈寄與提綱本手鉗爐鞴穩時無鈍鍊  
何妨矢上更加尖拈云寐語一場老倒慚愧恰好

師四字書窓以印實相

得正無非離一安

印空圓足寶瀾漫

天魔外道從何有

體若虛空世豈干

佳乘兩口草標頭

共見同看水牯牛

昨夜牧人無被蓋

今朝猶笑道無求

實離貫穿理不俱

一人直下體同渠

久停頑坐邪思起

返謗如來正覺虛

田頭十字路堂堂

鉗口收心便厮當

領得摩尼真寶藏

却來警夢表提綱

惠

定

觀

止



普庵老人於一微塵中出此止觀定惠若人會得於此寐  
語有什麼交涉許它一隻眼若人不會亦許它一隻眼叫  
叫且照顧溪邊獨脚橋子好好好好去蒼天蒼天

又頌

一輪心月耀昏衢夢幻吞侵誰得知幸遇知音重為舉息  
心回念理元輝

一句當天正信希欲談詞喪懶投機高峰既遠休尋訪不  
惜眉毛為發揮

一身清淨本無瑕了了歸家勝出家紅葉舞風須早覺莫  
將有限逐虛華

一心圓持種種心信心諸境絕追尋此中無分應難到便  
好回光免陸沉

頌斷甯餅

心法無斷滅踢倒一淨餅華林不柰何不脫聲色名真如  
俱是戲心境一等平不落有無用三昧本空清咄

重陽日頌

去歲逢重九風流主得賓黃花談般若白法樂天真今夕  
當良會高峰沒四鄰孤筇挑日月何道不通津

百丈先令慶上座禮拜求頌

西川慶上人本來沒弟兄須知自性如空體水月之中未  
解真箇事不傳聲色句元來心法獨靈明

送米與百丈頌

百丈孤雲入道林真如不動意難尋道人相見非來往語  
默全彰亘古今近日廬陵親得價一時分付老婆心



百文回頌

普庵標格出稠林千里披雲得得尋一見機鋒電橫影再  
窮玄辯古無今更將玉粒來相惠正是當人鍊石心

行者妙曉求頌

頭頭相應人希會物物皆真體不殊但辦肯心終不賺情  
妄想盡入無餘自是出家無眼目只言苦行落空虛甘贄  
在俗猶通理妙曉無求自得珠

紹椿行者求頌

假使八千五百歲紹椿松鶴未為奇不若紹明光不變此  
中實應出家時念道何憂衣食事千光影裏聽鶯啼聞聲  
一轉渾消息滿目蓮花不見枝

陳達獻菊花求頌

滿地風光未足奇霜前秋後吐金枝靈山親舉唯迦葉今  
日陳來衆共知不獨陶生時節用轉為華歲供阿彌聞見  
定歸依彼岸方知此日獻花時

郊粥

普目不拘開合眼意光何必待天明衆人未起我周布行  
益資它腹自膨

辰齋

爛渾湯水熟淘沙不着油鹽醬醋茶飢渴隨時冷少許只  
思因甚悟桃花

行住

割愛辭親如是行豈求衣食及為僧步步澄輝無別想卓



然獨立妙明生

坐禪

夜靜風悲人悄悄衆緣事辦寂寥寥趺坐結跏雲漢定誰  
知卧月忽明朝

習聽

生老病死苦相煎唯我能知速棄捐十二時中常念佛聞  
師一舉耳無邊

受持

聞道真空不着言信心清淨在拳拳只將此性光明遍語  
默行巖豈離禪

澡浴

了身如幻向誰言運水搬柴化有緣忽遇浴堂人指水輕

清妙觸轉光鮮

向火

雲凍風彌鳥絕蹤洞山只道沒西東等閑目擊誰相委賴  
遇丹霞作炭紅

飯頭

將勤補拙入厨中不問青泥事事充拾得寒山明此意如  
今成佛滿虛空

香燈

恒河沙劫奉如來功未全時眼不開自知本有靈光物香  
燈不絕警癡獸

知客

不虧掃地與煎茶門戶開關用法華雲出雨蹤來不住箇



中誰肯速還家

掃地

心地光明淨土圓一切人見我無言只拈掃帚東西撥震  
動三千及大千

侍師

百里千鄉信未圓到來空爇一尋烟我今朝夕時聞見粉  
骨碎身報未全

茶湯

主賓交接未開言便過茶湯應口邊察理聆音非外物結  
他歡喜萬千年

淨頭

護淨燒湯不離坑慈和三昧益群盲十方諸佛皆如是豈

效披毛業報生

浴頭

衆生垢重汨塵緣豈自收心向覺源挈水拾薪時節至三  
通鼓罷物皆鮮

柴頭

千年枯木老縱橫鬼怕神疑夜若燈不是道人誰敢動如  
斯應不是衆生

炭頭

火出木燼灰烟滅黑白無纖可作師喻若春風融臘雪普  
令冷暖沒偏枯

席頭

幾番舒卷濟群迷馬祖陞堂百丈知由是那時通一線而



今收放莫令遲

幹木

引領搬徒訪萬山深明下手處艱難圓成滿目蓮宮現風鐸聲清意自閑

幹竹

綠節閑雲間古風茂林濃處沒西東子猷消息無人問鸞鳳飛來足印空

幹瓦

和泥合水實辛勤不遇明師事不成今已連天鋪滿地順緣無漏必通津

幹磚

密跡彌綸不露塵天龍八部喜還驚劫火洞然無變朽此

中人轉普門經

幹石

塵劫塵沙積竇岩十方諸佛共同叅多寶聞經親涌現故非柏梓與松杉

合藥

扁鵲盧醫速退邊大家飽喫普庵圓解寃釋結消諸病感應無方不用錢

塔頭

如今無縫古稜層透石穿雲度有生普納衆緣無住着狀如一室百千燈

幹街

黃金布地非為富白玉橫街惹寇徒心地平堅塵不入修



羅萬億手難摸

幹橋

直截無根樹子鋪超凡越聖大心麁忘軀為法方如此擔板真如大丈夫

填路

轟雷吼電警昏蒙雨歇風清似脫空佛教衆生弘大道資家報國續宗風

園頭

千百年前老古錐鋤山鑿圃示箴規蛇兒挑起無人會直截橫拋更勿疑

米頭

靈源車轍顯來由一粒穿時快疾收莫待廬陵高索價臨

機下口卒難酬

庫司

摩尼無價汝當收金玉浮財捨莫求戴角披毛從此入百千萬劫作驢牛

右具足三十二頌以法報化普資衆行動誠奉佛而求最上乘因成正因果必正果永劫不墮其宗過現未來普應普庵老人如是書示尔時百花萬柳蝶拍鶯歌共證此事無漏無餘直得三門佛殿一切相許露柱燈籠和南稽首末後一句作麼生道○珍重

造塔示衆

求人不如求自己自己肯時無不成如今寶塔所將圓諸人盡發一輪心氣急殺人因悟道靈山會上沒閑人大小



不拘皆拽石高低齊轉普庵經山林岩谷皆微笑此是如  
來最上因若有癡頑撥不轉猪樓羊捲好安身老僧拄杖  
頭有眼不打披毛戴角倫如是斬釘并截鏡一人了事萬  
緣新

回彭居士書

某啓應求座右應目未嘗離左右扣宗差別風馬牛遲速  
不停俱滯學箇裏還須自肯休某土木恠形受恩非淺無  
心應物每悉意勤來書得味審惟尊性法我圓同大虛它  
家罕有得用迷因惑相乃屬識神妄認變為生死根元之  
幻本妙得一智不以色相音聲為窒碍乃識破了不被世  
間幻事所惑權喚作超凡之士直須一性圓通一切性一  
法遍含一切法不動道場以自法身遍滿十方無盡虛空

無針鋒許空缺處方契本佛與今應求始覺同源便解二  
十空門元不着一性如來體自同却好於十二時中行住  
坐卧一文一字皆歸實相門中語默歌吟盡屬無生之用  
不見馬大師與大梅和尚云但識取汝心無法不備且如  
心又作麼生識古者云不可以智知不可以識識○咦這  
裏着得一隻眼睛可謂識得無心達有心識心三界自平  
沉可憐迷望無心者只道無心境不侵故經云菩提心生  
生滅心滅若得菩提心生則都是你家中活計道有亦得  
道無亦得不被它瞞有無俱不到生滅豈相干得者隨機  
應未達莫瞞預言語煩多去道轉遠且道有心及第與空  
心及第是義同別不然但得無心之用更說什麼及與不  
及觸目相應無有不是應求底忽然覷破當下瓦解冰消



甚生暢快今日來書沒一字兩承光訪理非緣玉塵惠我  
耳中收光伴應求學秀川語錄并風水禪來晚令送時中  
非間千里同風萬億珍重

荅彭資深

體得寰中物忘機自葆光老莊言不及佛祖句難藏槁木  
非成道灰心豈離忙資深無欠少本有不須忘某以此訥  
言表繼嚴韻切異仁才勿以作詩解山僧某自媿宿習頑  
癡乏智慧種謬處此方披衣月頂表如來事幸於狂風之  
內針芥相投忽覺勞生俱為幻夢念念入華嚴境界步步  
登寶相門中攝境歸心更無它物即心即物寂照忘知大  
用現前隨機應物別無奇特只自承當今究資深所為晦  
光詩乃超然見性悟彼塵勞且有漸覺輝華滿之句似乎

於真空中所有妙蘊此念若得懃懃離物觸事圓通一體  
全收衆成虛幻所謂通於一而萬事畢去住自然不被生  
死輪轉延壽禪師云此理不可刹那忘照卒尔相違肇法  
師云至人空洞無像而物無非我會萬物以成己者其惟  
聖人乎石頭和尚一見便悟却乃云聖人無已而靡所不  
已所以訥句和呈云本有不須忘不見老子道上士聞道  
勤而行之中士聞道或存或亡下士聞道大笑之故有相  
告一味直言道無形視者莫能觀道無方行者莫能到在  
性之而已矣豈區區數萬言而可詮之哉此是圭峰草堂  
所示之言小僧了本之後常常味之不獨斯也自頂門一  
開應觀吾教佛祖所說經論禪句及先王之典今古聖賢  
一言半字無非是道何也金剛經云凡所有相皆是虛妄



若見諸相非相即見如來如來者佛也佛者覺也覺者道也夫道通者一也然後通於一而萬事畢無心得而鬼神伏伏者休也休者不動也不動即是道有應即是智定慧圓明悲智雙運故稱為佛性若人究得乃作含靈之主肇法師云天地與我同根萬物與我同體莫恠老倒語言三昧實謂無盡千億珍重此道

又答前人

南山北嶺如父母張三李四皆佛祖隨時只箇無着相許尔住山一鉢芥心齋與麼會更教老僧說箇什麼方便及乎到這裏恰如迷路之人欲問懶去欲去懶問問去不無通身全露畢竟見解人以這箇為體以萬法為用又不急又不慢時節到來非難非易大無妨小無碍只是於中有

真實者可以本末究竟若於中無真的可信之物故不可亂道也具來毫楮無不備悉應有應無即事即理所抄隨意大用現前可行者行可作者作別無妄逆於諸緣識破未然之病患心齋所願我願亦知道化非凡豈偶然如是古德云此經不入餘衆生手唯大心凡夫可以流通為一切衆生作方便起信功德因了知釋老為一切衆生發忻樂而現世為一切衆生發戀慕故入滅一切佛法且莫說一面做橋要得寬打了官恐更彼中缺欠娘爺眼睛時一面多方打會豈小老者只管還更教化彭仁仲圓契圓信圓定普印萬道友及諸來道友韋道友朝夕一等與它雪山肥膩飽草料莫令它飢恐橋了又失却你眼睛也是一場敗缺令人取笑周念一道友不可得極荷它此信此中



菜與我鄉亦如是且說及晏公諸友且慈悲耐煩別當面  
謝一切中只如是老僧和南

與應求書

某啓瞻應求眉宇昨來過辱寵惠厚勤言不可及假使百  
千劫贊歎莫窮盡實知應求昆仲所樂者皆可謂上士也  
凡俗安知之否老拙託熟敢以不避罪責而告於君幸以  
道義空心所交往來無所得念此一大事因緣出生入死  
汨沒塵勞無有覺者賴我佛釋迦以付迦葉轉轉相傳至  
今信入者一悟永悟更不復迷喚作無價珠用無盡利物  
應機終不吝此理非男女非老少究得者乃超凡越聖為  
世之尊永不避生死輪轉經云在家菩薩者是也永嘉云  
在欲行禪知見力火中生蓮終不壞只要識破世間幻境

認取本來元性甚不廢力昨日令兄恰來所亂道拙墨往  
往忘前失後莫為恠笑甚不專切文字又在憲兄寮中他  
夜來方回今特遣人賫去幸見收若無事可以簡錄早晚  
專附書問訊昨聞有往聽讀老拙將謂復往秀州恨恨而  
已復聞令兄云只在近處忻然忻然旬休不然得暇日千  
萬惠然再來可羨雪堂信至其文未到往往遣下今文字  
你封角道體無間幸君不昧紙窮道廣勿可言之

普庵至善弘仁圓通智慧寂感妙應慈濟真覺昭旣惠慶  
護國宣教大德菩薩語錄







